


瀏陽縣志



瀏陽縣志序



康對山先生志武功至今  
傳其書夫對山未嘗以科  
名自詡世豈以科名重武  
功志耶惟其體裁得焉耳

序

近代郡邑之乘既有成書  
受人而讀之曾未終卷歎  
倦思臥度置之不一寓目  
與覆瓿無以異良由輾轉  
沿襲而不知耻否則欲誇

已長而妄多附益以愚人  
耳目究之其書不足信立  
罕傳播焉足以為志瀏陽  
地廣賫繁頻經兵燹文獻  
無徵志雖屢葺疑竇孔多

序

二

撫軍趙大中丞惜焉時浙  
進士方君芑亭觀政來楚  
與修通志甫竣中丞屬以  
瀏志余延之寓於飛鷄亭  
之西偏浹月而書成考興

廢訂譌謬去蕪雜俾觀者  
展卷而知為為瀏陽乎志  
也夫瀏陽在楚省彈丸黑  
子耳譬庖丁解牛於奏刀  
嗒然後而烹小鮮詎不易

序

三


易是未足為方君竒然所  
謂體裁者不具此乎其書  
之足媲美武功志而可傳  
也余不敢知在讀書有眼  
者自辨之維余藉是以報

中丞公命或者其少有當  
乎是為序

雍正十一年三月既望文  
材即知瀏陽縣事江都陳

夢文撰

序



序

廣陵陳侯豹庵令瀏陽問俗觀民  
受具舉五年於茲矣徽軫餘暇手一  
編示曰此我所修瀏志心盍為我序  
余受而讀焉喟狀曰修云乎哉侯之  
言修也者約辭也蓋邑故有志從事  
者三數番矣泛而濫焉率以已啻闌  
又不善編摩頭緒紛出終日掀揭

序

五

而不得其處至於義例之弗合體裁  
之弗講更無論也侯一旦改而張之  
網羅舊聞鈎元提要讀例言十數則  
森嚴簡當折衷盡善譬諸 室易棖  
楔塗黜堊此其修焉者也今直斲棟  
梁闢奧突翬飛跂立魏峨改觀矣修  
云乎哉昔人稱賢大夫者謂能以文  
學飾吏治侯選籀披沙為一邑備

開卷霍狀

清澗官師人物山

川風土如此其炳炳麟麟文獻足徵也侯之造於茲邑者其人豈槿淹雅美觀已乎余於侯為同年又官於茲沐侯之化喜邑志之成興有厚世且不余鄙而索余以序余奚能默爾無言若侯為邑之賢行將司勲人稱古循吏者有輿人之誦在余不復序

六

道也

雍正癸丑季春下浣癸卯舉人瀏陽儒學教諭漢陽王全璧拜撰

瀏陽縣志總目

卷首

序

凡例

圖

卷之一

建置沿革

星野 祥異附

疆域 形勢附

瀏陽縣志

卷首 總目

山川

關隘 津梁附

城池 市鎮附

倉庫

公署

鋪遞

風俗

水利

田賦 戶口 物產附

卷之二

學校

職官

選舉 封印附

卷之三

祀典

祠廟 寺觀

名宦

人物 文苑附

瀏陽縣志

卷首

總目

孝義

列女

流寓

儒釋

坊表

古蹟

卷之四

藝文

示記

賦文

詩說

詳

總目止

瀏陽縣志例言

瀏志始撰於前明洪武不可考矣一修於嘉靖辛酉主之者邑令蕭敷成之者學博劉以身也再修於國朝康熙乙巳主之者邑令韓燦成之者邑庠生龍昇也庚申昇又續編再修於康熙甲申主之者邑令王珽成之者邑丞徐旭旦也雍正己酉邑令王君欽命從事編摩屬稿未竟溯厥源流不忘所自焉

邑所傳者王志也昨於友人處始覓得蕭志舊本

瀏陽縣志

卷首

例言

一

視王志較簡淨大抵王志取韓志作粉本而增益又無義例向來面目輾轉寔失茲所採取悉依舊志

皇上訓諭廣大精微如日月經天江河行地已允廷臣所請彙成全書發各省開雕頒給屬邑凡草莽臣工罔不敬誦典謨篇篇跪繹詎可採擇入紀載之冊舊稿登載茲不敢附和焉

瀏邑墮糧始自前明恭遇

本朝重熙累洽久道化成編民有好義之風大率

多傢之產前志所登茲不贅錄

邑志者志一邑所獨有其餘郡邑皆同雖不可不書記其大畧足矣舊本於學校臚列賢儒姓名重見複出甚乖體裁夫欲資考索自當遍讀家語史記及闕里志賢儒從祀考諸書非可專藉邑乘用博觀覽

舊本列其為綱而下紛列其目破碎蕪雜徒眩眼光如水利陂塘一事也乃列水利於疆域列陂塘於營建及考其書則疆域無水利也鄉村坊

## 瀏陽縣志

### 卷首

例言

二

里一事也乃列鄉村於疆域列坊里於風俗及考其書則風俗無坊里也戶口人丁一事也乃列戶口於風俗列人丁於賦役及考其書則風俗無戶口也其餘或綱與目不倫或書與目錯出或有目無書或書目各異不可殫述茲仿各省通志例自建置沿革至藝文臚為二十有六門以類附者又七門鉅細畢舉次第秩然其破碎者悉刪之未云廓清之功或得簡要之義首列建置沿革定其地也夫而後仰觀俯察故星

野疆域次之山川以表鎮關隘以設險故又次之於是乎營繕起焉故城池倉庫公署鋪遞又次之徐而察其土風行其阡陌閱其富庶故風俗水利田賦戶口又次之食貨足而教化興故學校又次之司是邑者官師也表是邑者鄉先生也故職官選舉次之成民而後致力於神故祀典次之祠廟寺觀又次之備矣又著其官師之賢者與鄉先生之可祭於社者以為來者勸故名宦人物又次之善行必書苦節必揚古之

制也故孝義列女又次之寓客有流風方外有別趣不可遺也故流寓仙釋又次之坊表以聳具瞻之望古蹟以暢憑弔之懷載筆藝文用資考索次之以此而志竣矣

祀典載在 令甲者有司舉行其民間私祭者不與故祠廟與寺觀別為一門

名宦但據舊志所書其居官未遠者統俟他日論定

舊本列人物為綱而分宦蹟忠烈孝行剛德廉靜

文學將畧流寓節義仙釋方技為目淆亂甚矣如歐陽圭齋而列之文學尤乖位置茲判為名宦人物孝義列女界限劃然文苑則於人物附之從其數也流寓別為一門仙釋方技舊本有目無書茲另撰仙釋畧存厥概方技無可考姑闕之

舊本載事多有譌誤如歐陽圭齋先蕪湖後調武岡平峒蠻本傳可考舊本刪去調武岡於尹蕪湖下即接峒蠻相聚云云蕪湖安得有峒蠻也

### 瀏陽縣志

#### 卷首

例言

四

如此之數疑誤後來雖蕭志不免至若易雄為魏又所執訛作魏人晞古以父節得官猥云與難且以順昌劉錡而冒為邑人尤為不經他如祝良古初孫普濟徐偉諸人皆屬牽合此則蕭志所無而後人強增者也茲詳考二十一史及明一統志姓譜楚紀諸書覈其事跡訂其舛偽其牽合者削之庶幾有所折衷可以傳信惟近時別無可考者則仍舊本焉

傳記直書某某史法也舊志亦然此體例之當從

者

古蹟舊亦有目無書茲從蕭志採錄一二餘散見山川藝文者細為標出小有依據豈云鑿空時代必次後先方位必分南北道里必註遠近詎云有脊有倫差免顛倒紛錯

藝文舊本摺捨無據者甚多如載韓昌黎渡頭聞鐘一首乃元人陳剛中瀟湘八景詩之煙寺晚鐘也昌黎集交州稿均非僻奧之書承訛襲謬而莫知詎不令見者噴飯今悉刪正止載其簡

瀏陽縣志

卷首


例言

五

當切要者

引據史書必標出處使閱者知所自來問有舛訛原籍可訂拾遺索隱既乏通才錦軸牙籤亦少群籍大雅君子幸共諒之





瀏陽縣志卷之一

瀏陽縣知縣江都陳夢文重修  
湖南候補知縣壽昌方暨謨編纂

建置沿革

周禮職方荊州為次土宇版章式廓無二彈丸  
小邑其隸

皇圖體國經野百世遠謨

瀏陽禹貢荊州之域

新唐書云古揚州南境

商為荊楚周為

楚國秦并楚立長沙郡漢為長沙國東漢復為

瀏陽縣志

卷一

建置沿革

一

長沙郡屬荊州三國吳蜀分荊州長沙郡屬吳  
置瀏陽瀏陽之為縣始此晉永嘉初析荊州十  
郡置湘州以長沙郡城為治縣隸之宋齊梁陳  
並因之隋省入長沙縣唐景龍二年復析長沙  
縣置瀏陽隸潭州長沙郡五代馬王以潭州為  
長沙府建國宋復為潭州長沙郡縣隸之元初  
改長沙郡為潭州路縣隸如故元貞元年以戶  
口增至萬陞縣為州天曆初又改潭州路為天  
路州隸之明洪武二年復為縣隸長沙府